

特 116

818

湘洲詩鈔

9 1 2 3 4 5 6 7 8 9 10 11 12 13 14 15 16 17 18 19 20 21 22 23 24 25

始





特116

818

湘洲詩鈔

特 116  
818



湘

洲

詩

鈔

大正

14. 2. 21

丙寅



歐陽文忠公集卷之四

湘洲遺稿序

明治之朝雖歐學新興而漢學者宿尚存故志士能詩文者亦不爲不多時則有如我湘洲島田君者矣君越中人也少時游東京出入諸家門慨然以天下自任其志往往見諸詩當是時中興日淺憲法未立執政百吏因緣用事士子懷才抱略者多不得志于有司君亦坎壈蹉跎僅官于東北一縣非其志也棄而歸鄉衆推爲縣會議長偶聞立憲改進黨起于東京決然往而投之後選爲衆議院議員初議會始開與政府不諧解散議員之抗直者政府極力阻止其選舉君與予輩同志頻



逢困阨爲刺客所狙殆死而僅免爲議員者七年疾作而罷時歐學盛行如詩文人棄而不顧君宿好依然未嘗肯廢吟哦然其平生志存國家不幸終不得大展徒託之空言而止悲夫顧予之于君夙與上下議論亦時從而詩酒徵逐相娛其知君也審矣今者庶政一新人才登庸嚮之因緣用事者凋落略盡設令君尙在乎予必將奏薦而同立朝也而今也則亡矣君詩喜杜樊川而慷慨風流亦猶樊川也君晚年手定三百首爲一卷頃者內山君外川悼其湮晦而不著捐貲而刊之徵予序予故道其生前之所由而哀其遭逢之不幸云君名

孝之字維則湘洲其號

大正十三年八月

友人犬養毅撰







登樓終軍輕棄繻便去游東都稽留東台隅大政歸王  
室萬機出一途天子茲奠都才傑登庸初措大迂世務  
何以適時需歸來閉戶坐兀兀對簡書伊尹耕有莘諸  
葛臥草廬當其鷹揚日功業配典謨捫蝨談當世磊落  
抱幽圖擊楫渡中流慷慨清寰區賈生年十九治安擬  
老儒我今二十四志業易齟齬天地慘將暮冰霜迫歲  
除唯有宿昔志秉節不敢渝感此耿不寐青燈夜窓虛

從軍行

時明治十年二月有西南役

薩海肥山莽蒼中壯士從戎意氣雄維時丁丑春三月  
東風吹雪殺氣濛丈夫賭命報家國獻捷只合奏偉功

往矣海陸三百里錦旗到處草靡風

病後書感

係明治十年青森宦游中作

獨凭欄角嘯長風滄海茫茫思不窮措大未修經世業  
三秋節物去忽忽

木葉蕭蕭天始霜西風望闊憶爺孃五年孤負南陔膳  
恨向白雲飛處長

詠史

回天偉業獨推君此是當年飛將軍順逆有常雖誤事  
勿將末路沒元勳

顧問恪勤天下聞漢廷不復乏元勳韓彭醢醢淮南斃



有始有終唯有君  
豈止維新創業成能將經濟補蒼生  
星楂一到天津日  
別有胸中百萬兵

春日青灣偶成

孤身一自去天涯  
每值年華感倍加  
不獨宦游違定省  
春風三負故園花

七段坂

落日西春岩岳巔  
回頭故國路三千  
秋風瑟瑟吹蓬鬢  
折阪羊腸馬不前

野邊地抵青森途上

一劍又登東奧途  
西風落日跨青駒  
摩天岩嶽巍然聳  
百里送迎不負吾  
從此海門灣又灣  
孤吟跨馬度邊關  
東風四月奧州路  
白雪摩天岩木山

明治十三年庚辰五月將省親於舊里有作

青海煙波望渺然  
省親此日又登船  
遙思白髮倚門切  
一片歸心急似弦

泊新瀉洋

滄海茫茫八月濤  
中宵澎湃舞征艘  
夢醒獨倚牙檣望  
寥廓無雲北斗高



三廩懷古

東奧之尾北蝦首山勢蜿蜒皆北走東控太洋西鄂羅  
北門鎖鑰嚴攻守海風吹浪馬逡巡怒濤打岸腥敗鱗  
晚來投宿三廩驛地屬邊陲風氣淳維昔源郎過此地  
落荒蒼皇止三騎艱難未肯泣途窮三十六計絕海避  
憶起九郎膽勇世絕倫兵機運用妙通神播陽驅逐壇  
海役叱咤風雲氣益振功名蕭牆生釁隙冤魂不洗空  
落魄踣天踏地無所依英雄末路真可惜君不見保元  
以來弛皇維百戰未曾見義旗就中源家最慘毒骨肉  
相食無孑遺

龍飛岬

海風吹浪夕陽收蹈破蜻蜓欲盡頭當是邊防要衝地  
浮雲直北鄂羅州

歲晚青森客中感懷四首

抄二

旅館沈吟坐夜闌長空黯淡歲云殫剛風捲海潮聲怨  
急霰打窓燈影寒浩蕩徒勞千里夢歸休欲慰二親歡  
宦游本不全終策擬向家山賦考槃

襆被蕭然四歷秋雪泥鴻爪路悠悠愧無涓滴補聖代  
空有邊陲嘆宦游爲客難逢開口笑思鄉兼念倚門愁  
殘年寂寞青灣酒心折西風百尺樓



明治十五年三月辭官將歸舊里留別青森諸友  
遙思白髮倚門頻四載東游跡已陳今日乞身歸舊里  
敢違知己不違親

江嶋登覽

絕頂高樓俯碧瀾一杯買醉旅思寬天風忽拂水雲去  
八朵芙蓉隔海看

雜詩

知己寥寥無可親擬求尙友擇吾鄰千秋灑落邵康節  
絕代英姿王守仁  
利猾名癡互引牽愧無奇節擬先賢史編二十翻來後

欽仰當年一魯連

寄懷矢野龍溪在歐洲五首 抄三

萬里秋風雁陳分遙憐孤客念離羣登樓目斷日東月  
戀闕夢迷葱嶺雲麟閣功臣曾致死龍門名士獨推君  
緒餘新著傳天下絕世美談經國文

遠別悠悠歲月道天涯蹤跡儘淹留尺書遙寄歐洲域  
健鶻高飛海峽秋一代文章託雄志百年懷抱足良謀  
從來我有四方志擬濟洪流俟巨舟

不趁山林稽阮曹澄清天下是人豪江湖讜議姓名重  
洛下新編紙價高侷儻權奇君駮驥棲遲零落我蓬蒿



何當重話平生意夜夜雲山夢寐勞

先考一周年忌辰二首

抄一

粗豪何以慰幽魂聊取香花謁墓門奈此夕陽風木感  
立身祇合報鴻恩

佐久間象山

絕海鯨濤走火船邊防論策正紛然滿朝未免井蛙見  
不問當年審敵篇

石動山

海山蒼莽夕陽空勝概依然指掌中憶昔英雄遠征日  
軍門橫槊賦秋鴻

買梅得支字

傾却慳囊買一枝冰心鐵骨兩相宜滔滔天下誰知己  
獨對梅花肝膽披

明治廿一年一月與同志者相謀論時事將上書  
元老院使余代陳事情臨發有作

經綸要在養元元臺閣誰能納蓋言志士如雲屯闕下  
斯心不敢負君恩

雪滿乾坤歲月深天時人事共蕭森邦家厄運至斯極  
擬代同胞捧赤心

蕭條人事入悲酸肉食誰知稼穡難廟議儻容休養策



長教社稷泰山安

又把壺觴強自寬  
寒雲漠漠雪漫漫  
吾儂不是賈生比  
欲爲斯民策治安

舉目堂堂歲月移  
中心憂國又傷時  
欲全社稷萬年計  
須樹君民共治基

鴨涯大嘉樓矢野龍溪招宴席上

暮色蒼然晚照收  
閑游偶伴李膺舟  
他年須記逢君處  
第四橋東第一樓

宿春日野山中

時明治二十二年  
二月上京途上

羊腸路遶地逾偏  
峻阪攀來宿絕巔  
半夜夢醒山館靜

一輪寒月掛巖肩

明治二十二年二月十一日頒布憲法臣孝之參

列大典恭賦

宣揚遺烈建洪基  
正是邦家萬世規  
聖代堪歡恩命渥  
天顏咫尺列宸儀

滿城佳氣鬱祥煙  
此日憲章天下宣  
億兆庶民迎鳳駕  
歡呼寶祚萬斯年

丁酉歲晚寄大隈樞府

生遭中興日  
臣節爲君殫  
伯仲期伊呂  
憂危見富韓  
中流成砥石  
隻手障狂瀾  
恨不折衝了  
笑談樽俎間



詠吏

三軍出巴蜀萬馬若雲屯一夜大星墜秋風五丈原

讀史有感

余遭難以來連旬養病身猶缺健康偶諸友勸游京師以自養乃以三月念六起程先是有衆議院臨時選舉之事政黨爭競分爲二曰民黨曰吏黨而吏黨之所爲最可惡甚則使嗾兇漢攜劍銃成隊伍青天白日橫行於所在以威逼良民殺傷志士毒燎虐焰莫所底止使天下之生靈沈吟于暗黑裏汗瀆國憲之神聖侵害國民之權利者莫大焉痛恨大息之餘

慨然有此作實明治二十五年二月十五日也今錄之者要存當時境遇於他日胸臆耳

殺氣濛濛人勝天腥風血雨晝蕭然一從奸吏弄威柄海內生民急倒懸

奈此紛紛擾擾何青天白日弄干戈千秋汗點何由雪俯仰乾坤感慨多

謗聲未弭起悲聲趙室誰誅呂惠卿顛倒是非壓公義上欺天子下蒼生

豺狼梗路路難行志士仁人身作牲仰訴蒼天天不答山川滿目淚縱橫



誰扶天柱補地維家國前途累卵危留得人間公論在  
精誠自有貫通時

行路難

猛虎立我前層崖落我後舉足履荆榛側身避雨驟行  
路方艱難吾道窮益堅蒼茫去故里間關繞山川山川  
添淚眼乾坤悲生事悵然念故人無由寄愁思愁思一  
何切浮雲蔽杳冥安得澄清志排空掃妖星

過柳瀨

羣巒重疊樹蒼蒼形勝依然古戰場休問猿郎用兵略  
七槍猛士破天荒

鴨東漫吟余游京師日探名區適意散策身心頓  
覺爽乃賦此以遣

九陌黃塵車馬紛身兼世俗不成群浴餘樓上無餘事  
獨對青山看暮雲  
高閣峻嶒勢欲飛何來空翠滴吟衣天風忽送梵鐘響  
三十六峯收夕暉

鴨東冶春 節錄

綠鴨川頭賞麗春風搖簾押酒生鱗莫思身外無窮事  
枉擬太平行樂人

春江漾漾水平莎好泝運河攜酒過日暮南禪寺畔路



園林翦鬱鳥聲多

霞紅煙紫幾重重中有蒼然百尺松玉笛一聲吹入破  
餘音瀏亮起吟龍

暖風遲日試春衣第四橋頭去浴沂攜妓東山非我事  
賞花名苑未能歸

疏水運河

偉哉形勝地人巧奪天工舟自洞門入水穿巖腹通不  
是蛟龍窟似探禹穴中豈止江山美雄圖冠日東

望湖樓

神女洲何處烟波浸太空湖光與山色氣象萬千中

鴨涯僑居雜吟

樓居對霞壁詩酒寄嬉敖傑閣憑虛處亭亭一塔高  
山媚水明地重來感昔游龍盤兼虎踞依舊帝王州  
欄下蔚藍水簾前紫翠山晨昏無一事時把我詩刪  
細雨遮青嶂淡煙籠碧灣模糊難認處三十六東山

次韻藻谷海東見寄

倦客還成彈鋏歌得君佳什感逾多寸心千古向誰訴  
一劍十年猶未磨慨世文章看意氣憂時懷抱託吟哦  
想望風采逢知己奈此天涯隔闊何

湊川



海門東去湊川頭下馬楠公墓畔秋水自悠悠山自遠  
孤碑留重帝王州

平蕪南陌又東阡一帶江流水接天獨向楠公祠下拜  
蒼茫暮色起愁煙

百萬虎狼前後當矢殫刀折馬還僵湊河一道南流水  
孰與英雄遺恨長

王業中興第一功兒童走卒說楠公猶留千載英靈在  
大節巍然廟貌崇

一谷

千仞懸崖鬱不開蒼茫回首有餘哀須磨浦上暮煙合

鐵拐峯頭落日頽蜀道風雲從叱咤咸陽宮殿委飛灰  
悠悠七百年前恨付與旗亭酒一杯

舞妓灣

舞妓灣頭雨始收一盃聊此洗羈愁亂松露滴斜陽入  
隔海青螺掌上浮

菟道懷古

青山簇簇白水決流峙依然舊戰場憶昔平相當國日  
威福滿拳極跳梁一門權寵傾內殿六十餘州采邑遍  
口銜天憲蔑至尊生殺與奪出獨擅海內生靈怨恨深  
誰除頑兇慰宸襟王家老臣源三位隻手誓擬掃妖稂



奉來龍種戰此地欲賭一死表忠義州郡諸源如雲興  
平家衣冠遂失墜時方壬辰五月天我來吊古剎前  
殘碑沒草字半滅興亡閱盡七百年茫茫恩讐何處是  
唯有苦節傳青史嗚呼漢江之水菟道山江山終古獨  
洵美

萬碧樓十首 抄八

山容與水態一碧映層樓無限清音裏洗我半日愁  
擾擾塵途事匹如風捲瀾青山看不厭盡日獨凭欄  
溶溶還漾漾江水意何深貪見錦鱗躍聊忘遲暮心  
白雲入懷處青翠濕衣時安得江山助攄吾百載思

美哉漾漾水於物而魚跳個裏有此樂悠然塵慮消  
朝見江上山青翠滴牕几有念喜仙蹤世塵逃此裏  
飄蕩成何事半世夢亦慵江山如有待萬碧遶樓濃

發京都

回首謝送者遲遲發洛城東山如舊識起伏勞送迎上  
車望京甸美人不相見城東賦冶春嵐峽想仙醺稽留  
寶七旬煙霞交結親飄蕩數遲暮緬思感慨新人事不  
可恃公議百世俟行藏念昔賢唯有江山是

暮秋遊金澤兼六園

把酒譙樓四望開荒城落日思悠哉插天翠壁層層出



繞郭晴川歷歷來一代浮沈歎晚節百年懷抱入淒哀  
江山自古感游子誰是登高能賦才

育王山下古城陽寥落乾坤殊自傷海內交游多契闊  
中原風色尙淒涼滿園紅葉翻斜照半徑黃花委肅霜  
猶有壯心未全已慨然憑劍向穹蒼

漠漠荒煙欲夕陽九秋雲物始淒涼龍山臥與高城並  
犀水流連平野長王粲薄游憐失意牧之放浪任疎狂  
蒼茫回首傷神處望美人兮天一方

百雉重圍金澤城城南勝概上崢嶸艱危漸厭塵途累  
疎放徒馳丘壑情萬頃風煙秋影淡千章古木夕陽明

何當閒着謝公屐再向東山尋舊盟

次韻漆間履堂見寄二首

抄一

太刀峯上月初圓便有鴻書破寂然高義如君真豁達  
粗豪慙我久迍遭傷時擬續登樓賦抱病慵看審敵篇  
人世難逢開口笑千秋同歎杜樊川

和內山外川見贈四首

抄一

豈唯筆力動乾坤意氣慨然風雨吞盛世猶存逐客令  
明時未雪黨人冤千秋高節東山臥一代風流北海樽  
古道茫茫堪可踵此心只合與君論

明治二十五年壬辰歲晚書感寄犬養木堂尾崎



學堂時聞下院通過歲計豫算將奏劾選舉干涉之弊事

歲華冉冉暗中移早晚風雲際會期海內故人多契闊  
華門寒士伴棲遲秋鷹整翮誰能敵天馬行空不受羈  
自是九重終奏議此身聊以慰愁思

天入嚴冬萬木號紛紛飛雪捲崩濤中原形勢一棋局  
海內聲名雙鳳毛與世同流非國士當途逃責豈人豪  
憶君長劍倚樓處千丈光芒星斗高

牢落乾坤一笑難華門高臥豈泥蟠冰封大澤龍蛇蟄  
雪滿深山草閣寒欲爲聖明除弊事却教羣小擅夸謾

杪冬風物無人管獨剪青燈讀杜韓

上伊藤宰相

龍蛇慘澹日紛爭霹靂一聲天未晴只是蒼生遲謝傅  
忍教書客墜秦坑浮雲蔽日冥冥下乾霰飄風剪剪輕  
欲策國家長久計須容輿論愜民情  
聲望隆隆恩寵頻致君堯舜贊經綸唐朝藩鎮傾宗社  
宋室安危繫大臣元祐黨人豈橫議熙豐弊政劇酸辛  
願全上下和衷美長使乾坤鼎鼎新

失題

草莽龍鍾賤丈夫名場失脚感榮枯百年人事駒過隙



六國交盟狼跋胡未有涓埃酬聖代空教羣小傲當途  
山川佳麗天王地勿取恬熙愆壯圖

游大巖山日石寺

明治二十六年八月

攀林踏閣到山巔細路奇巖恠石邊願借當年柳州筆  
貌將仙境入詩篇

山閣憑空繞紫煙飛流千尺落窓前風吹素雪飄餘濕  
疑是白龍登九天

大巖山八景

鷹栖飛瀑

蒼崖掛飛瀑白日紫氛羅直下三千尺喧逐萬壑雷

林窟曉鐘

已游白雲境更宿白雲扃隱隱晨鐘徹撞我懶夢醒

古洞寒苔

石路滑苔蘚洞門吼瀑泉山深如太古長嘯意悠然

磯浦遠帆

兩山中斷處決皆入風煙萬頃浸坤軸一帆天際懸

削壁霜葉

攢峯如列戟峭壁矗蒼穹一路萬山底白雲紅葉中

蓋松春雨

恠松倚崑岫聳拔絕塵埃一雨颯然至洪濤天上來



雙巖斜月

鬼削與神鑿削成夫婦巖巖肩掛斜月雲臥冷輕衫

經巒晴雪

返照羣山外羣山秋雪中白雲自舒卷又與我心同

雪後所見

凍雲漠漠擁前岑雪壓南林又北林獨有梅花堪苦節  
一枝長看歲寒心

奉賀大婚二十五年盛典恭賦七律二章

紫宸瑞靄穆皇皇閱武乘鑾出建章十萬貔貅從象衛  
百官劔佩儼鵷行雲中送奏咸韶合天上雙懸日月光

一系三千年寶祚鎮教威德耀殊方

雲開閭闔會群仙黼坐貌爐靜吐煙內則四星明應曜  
維皇建極德如天風微太液彩鴛浴日暖觚稜金爵旋  
億兆蒼生霑恩澤歡呼擊壤萬斯年

明治二十七年十月十五日開帝國議會於廣嶋

大本營下十七日大駕親臨舉開院之典臣島田

孝之亦與焉恭賦一絕

霓仗連雲羽騎屯天威咫尺拜綸言我皇宵旰憂家國  
翼贊宏猷答聖恩

將軍行



瀕洞風塵暗海山邊城遙望大連灣丈夫賭命報天子  
不破燕京不肯還  
跨海長刀意氣豪電光一擊斫鯨鼉猿郎雄略肥州武  
不及諸公勲業高  
海洋嶋對大同灣天將飛來破百蠻叱咤風雲千里急  
不令一敵出燕山  
禹域茫茫四百州天兵一戰氣橫秋長驅直擣幽燕地  
帶礪山河唾手收  
一從飛將駕艤幢十萬韃兒鑿海中料識胡王須破膽  
三軍昨夜向遼東

明治二十八年乙未新春紀事

孟陽振盪入昌年我武維揚絕海天塞上風雲隨叱咤  
遼東父老乞哀憐攻城便仗三軍勇宣戰長歸萬乘權  
自古和戎愆國是廟謨願使後圖全  
百萬胡兵卷甲趨薊門重鎮眼中無遼陽草木霑鴻澤  
渤海風雲入壯圖敵將未聞殉宗社王師行見迫幽都  
東洋大計運籌熟知我皇威震八區  
十萬貔貅擁旆旌魚麗陣接塞雲平陰山飛將一鞭走  
鐵嶺哨兵深夜行海上波濤翻巨艦天邊勦伐壓長城  
諸公建業今如此整頓乾坤答聖明



居庸千尺地形雄極目幽燕道路通胡騎重來橫朔北  
神兵一下略山東至尊仁德乾坤大諸將功勳岱嶽崇  
四百餘州皆震動長期萬國仰皇風

雷霆一擊剪余皇地裂山崩勢莫當威海灣頭浪澎湃  
劉公嶋畔月淒涼可憐君相俱庸劣所恃金湯亦墜亡  
獨有汝昌能殉節忠魂毅魄厲冰霜

渡海艤幢勢似龍榮城城外急狼烽三更鼓角嚴軍令  
舉國風雲厲戰鋒禹域山河看破碎嶠夷草木入提封  
折衝須董膺懲典立馬燕京第一峯

壘粉北洋堅艦無長驅只合陷幽都山河萬里鼓聲急

滿漢八旗兵勢孤選士和衷扶廟算率濱爭請應軍需  
太平良策且休問當有天人翊聖謨

失題

三軍如破竹絕代奏奇功廟堂有遺策一蹶壯圖空  
吾欽范文正獻納有忠謀出督三軍帥入先天下憂  
雄圖吞宇宙勢欲破天荒鐵路三千里蜿蜒廣漠長

湘南紀游

匹馬飄蕭幾度過金湯形勝舊山河英雄一去壯圖盡  
草色連天古壘多

迴巖古木帶悲風有客登臨感慨同落日白旗山下路



居人尚說巨頭公  
亂雲依舊擁祠堂  
墟落蕭條古戰場  
更有青山餘土窟  
千秋遺烈仰親王

舞臺百尺認遺基  
一片貞魂弔靜姬  
蹈雪芳山人不見  
斷腸忍聽線絲詞

東風廢驛醉歌行  
七里灘頭晚照明  
天外玲瓏千載雪  
芙蓉八朶笑相迎

明治三十一年戊戌四月辭衆議院議員候補有  
作

風雲追逐去來頻  
誰是急流勇退人  
冊載微名聊復爾

歸休只合養天真

文學博士重野成齋先生七十壽詞

春風七十古稀年  
矍鑠英姿恰似仙  
一代文章推宿老  
千秋史筆壓前賢  
紅桃白李映瑤席  
玉敦珠盤妝綺筵  
詞客滿堂齊獻壽  
靈光仰見獨巍然

送岡鹿門先生

俗儒死章句一笑徒  
辛勤少壯負志氣  
志氣凌秋旻萬  
言擬董賈開口說  
經綸文章追韓柳  
風雨筆有神慷慨  
論時事囹圄磨不磷  
遭逢中興日台命  
列史臣國黌授  
子弟獻芹敘彝倫  
乞骸脫羈絆雄志  
一朝伸萬里游禹



域天涯如比鄰北窮秦關險西泝長江津燕趙風雲會  
齊魯觀國賓歷歷勝游地新著千萬言戊戌秋九月再  
逢神江濱載酒開祖道試把所懷陳愧我半世業馳驅  
枉酸辛九回登議院清議徹楓宸氣運漸一到更始際  
革新故人半臺閣赫赫秉樞鈞才拙多病久疎懶養吾  
真暫見奔競輩日逐車馬塵

明治卅一年我憲政黨組織內閣同志者入臺閣結末故及

三十二年己亥四月十六日吳邱看桃飲小桃源

同諸同人賦

小閣林邱裏登臨四望收青山排闥入白水遶城流松

翠樹間坐桃紅花下遊十千沽斗酒一酌散春愁  
路向桃源入春光別有天杖藜隨好客詩酒會羣仙日  
暖山如睡風柔花欲然年年人醉處迴立夕陽前

己亥五月抵伊勢山田謁太廟

神都形勝此登臨太廟威靈自古今瀉玉碧泉春灑灑  
參天翠柏晝森森萬峯柱笏排空列二水褰裳入海深  
落日蒼茫望紫極細縕祥氣帶巖陰

千年古木鬱葱葱仰見祖宗威德崇百代本支涵聖澤  
八州黎首沐恩風江山環擁神都外日月照臨寰宇中  
一系聯綿開帝統金甌社稷慶無窮



次韵藤嶋瞻岳見寄作

落落才名傳世間相逢談笑共開顏  
近來稍脫風塵累一片閒雲看碧山

柴門謝客坐黃昏落木蕭蕭風雨蕃  
學涉三才明大道法依二諦報天恩  
白蘋花掩神陽渚霜雁秋高劔外村  
教海波瀾漸將急知君日夜愴心魂

明治三十三年庚子新年作次韵藍田刺史歲首

詩

葦門初日破春昏家對青山吾道尊  
竹外梅花環矮屋雪中松柏挺孤村  
身逢聖代老荒僻衣近御爐留舊痕

遙想鳳凰宮裏宴千官劔佩拜天恩

寂寞柴扉掩夕昏閑居自詫布衣尊  
門前種柳山中里驢背探梅雪後村  
歲月水流徂不返功名春夢了無痕  
阿孃老健兒孫長一盞屠蘇亦國恩

一月念五送別藍田

雪壓吳山日欲昏一尊離酒慰行軒  
送君橋北橋南路細雨梅花也斷魂

層椒錦樹圖

霜落寒林淡夕曛樓臺縹緲小橋分  
千章楓樹爛披錦半暎層峯半白雲



萬峯重疊擁仙寰家在丹崖翠壁間不是太癡誰畫得  
白雲紅葉夕陽山

雨夜吟詩時有北清拳匪之亂

涼風吹夜雨蕭瑟秋意冷暗蛩鳴幽草墜葉滿寒井人  
生如白駒堂堂三光騁飄零憫拾遺憔悴憶獨醒感激  
不成寐沈吟坐夜永茫茫四百州頑獷擾四境出師入  
燕都邊郡未寧靜黨人乘風雲一朝持國柄折衝誤機  
宜宗社恐不拯自非命世才安便友邦靖更闌燈欲殘  
此意獨耿耿

秋晴郡圃散策得尖開二字

秋入平原霜氣嚴孤吟出郭望青帘雲中忽現高寒色  
雪削刀峯第幾尖  
荒涼野色入悲哉落日西風白雁來愛看孤芳全晚節  
傲霜黃菊犯寒開

季秋寄人

曦馭匆匆白髮公此時感慨與誰同龍蛇遠蟄西風老  
秋冷深山大澤中  
感激飛騰彼一時名場今日嘆棲遲當年舊雨多星散  
獨向西風有所思

落托江湖大布衣擎天事業與心違掣鯨碧海空閑却



風月珊瑚掃釣磯

鴻飛劍外霜初下  
世事浮雲感變化  
與君憂國酒細傾  
思到墨江風雨夜

青年志氣獨崢嶸  
作畫賦詩看性情  
萬壑雲煙驅筆底  
淋漓潑墨欲飛鳴

江涵秋影暮煙含  
詞客如雲佳句探  
鄴下秀才王粲在  
登樓賦就壓同參

萬古文章李杜壇  
筆搖鯨海鶴天寒  
蜉蝣撼樹真堪笑  
學奧無人窺一端

星社風流獨屬君  
縱橫彩筆策詩勳  
越山湘海分千里

腸斷江東日暮雲

詩酒逍遙憶勝遊  
白雲三十六峯秋  
知君不聘謝公妓  
意氣還能輕五侯

別來如夢又如雲  
每見鴻書意緒紛  
萬頃澄湖明月釣  
徑將擊汰往從君

雨中五千卷堂清集得吹秋二字

白蘋江上雁來時  
倚遍欄干帽角欹  
隔水雙鬟寒色晦  
殘雲爲雨夕陽吹

鋪首慵揚有所思  
蘭枯蕙碎入秋悲  
妝樓寂寞葳蕤鎖  
一任寒風捲雨吹



五千詩卷欲埋頭乃是先生高臥樓絕代風流凌庾鮑  
一枝健筆氣橫秋

零煙碎雨夕陽收百尺長橋蘸碧流擊汰雙鬟山下去  
扁舟一棹沈寥秋

冬夜話雨庚子臘月初二湖海吟社例會席上分  
韻得看長二字

促席傳觴坐夜闌滿林陰雨一燈寒恩牛怨李休重問  
身外功名袖手看

颼颼殘葉洒庭牆鏡裏秋風感鬢霜話盡十年新舊雨  
檐聲偏與此情長

送內山外川上京時立憲政友會入內閣黨首有  
瀆職之譏故及時明治三十三年十二月十三日

也

白雁南征木葉飛深杯祖道送登畿興來意氣懷當日  
老去功名惜落暉大事寧容誤朋黨諸公謾謂傲輕肥  
寸心許國今何有慷慨因君空涕欷

舉目人間行路難送君此日思漫漫青雲萬里動高興  
白髮數莖羞老殘植黨元知屠狗客立朝何謂沐猴冠  
明廷不合容宵小第一登壇要糾彈

明治三十四年一月余偶罹病至四月中旬癒此



間交友慰問數百人大橋二水屢過訪焉次韵其  
寄贈之詩

衡門謝客晝沈沈藥杵聲中簾閣深抱病索居思契闊  
懷人獨夜只呻吟一春花柳留愁眼廿載江湖論素心  
斃甕風塵非我事何當把臂入山林

當軒山色淨繩床珍重新詩意趣長鄴下風流今尙健  
杜陵潦倒古之狂生逢明主憫多病老念親朋定斷腸  
欲報瓊章慙才拙夕陽回首思蒼茫

和病中石黑孤標見寄作

幽居悄悄掩重扉一任人間萬事非顧我病軀宜鷓退

讓君少壯合雄飛落花寂寂鳥聲入春草茫茫人迹稀  
獨臥南窓朝復暮半簾疎雨夕陽微

五月十九日柳原村莊清集席上卽事分韵得高

枝二字

滿堂詞客會同袍又趁元龍湖海豪映發江山生氣色  
凌雲健筆格彌高老樹繞屋苔蘚滋淋漓潑翠夕陽移鶯啼  
字喚看難見都在綠陰深處枝

長夏園廬得蘭樓二字

綠樹重陰擁屋端小園成趣日盤桓病餘事業君休笑



抱甕斟泉漑竹蘭  
園林樹密鳥聲幽  
雨後涼飈白日悠  
看看榴花吐丹艷  
滿枝火焰欲燒樓

七月念湖海吟社例會席上卽事同木蘇岐山島  
春圃石黑孤標石野香南橘勉齊五十嵐旭泉吉  
川江村半井仁里稻垣外山山中白雲岡崎藍田  
內山外川大伴岳陽諸子賦分韵得深欄二字  
樓上美人橫素琴爐煙斷續夕陽沈崑山玉碎鳳凰叫  
一曲妙音歌正深

鷺盟鷗約偶成歡徵逐風騷李杜壇落日登樓望平楚

吳山倒影入憑欄

清人清麻呂

浮雲蔽日失光輝

何物妖熒犯紫微  
忠義忘身全大節

微公誰與肅天威

無復一人能糾姦  
滿朝紳笏沐猴冠  
自言我獨慚天地

憑仗茲心正氣完

雨後到近村得柴蒼二字  
天對雲墨雨新涼  
亂鴉呼我出長街  
雨過村園晨色佳  
珠露彈人行不得

牽牛花掩半扉柴  
雨洗新秋顥氣涼  
西風吹送稻花香  
一聲短笛人驅犢



落日平蕪暮色蒼  
西風吹散詩文香一筆  
送石野香南畫史之東京

涼秋九月天欲霜  
酒醒攜手上河梁  
落日回首望飛鳥  
暮雲卷雨山蒼蒼  
看君丹青出天授  
潑墨淋漓氣雄厚  
越山能海羅曾中  
又向輦下求師友  
明治文物日彬彬  
建設畫學講藝文  
宣和御府五嶽觀  
天下名手如雲屯  
我聞作畫尚氣韻  
董巨荆關總天分  
披麻斧劈何紛紛  
南宗北宗莫復問  
芙蓉秀色拂雲煙  
玲瓏八朵當空懸  
師人不若師造化  
開闔變化窮自然

吳山晚晴東皋步眺

雨洗殘炎無點塵  
稻香撲撲四郊勻  
從人呼做陶徵士  
一路黃雲映角巾

九秋雲物入悲涼  
落日平原起雁行  
也似雙忠祠下路  
寒鴉枯木冷斜陽

寄題岡崎氏藍田村莊

以下係明治卅五年壬寅作

松杉蒼鬱水潺湲  
蘚徑無人晝閉關  
洗得黃塵如改眼  
借君亭館看青山

二月十六日見山閣小集同岐山藍田外山仁里  
白雲江村神水旭泉諸同人賦分韻得蕭頑二字  
墻陰殘雪未全消  
忽喜群仙枉桂輶  
今夜梅花幾分發



滿窗春雨晚蕭蕭

焚香掃地掩柴關詩意不離泉石間江左清華君輩在  
愧吾依舊任疎頑

江上春望

春衫白馬步遲遲隔水東風颺酒旗正是清明時節近  
么桃點絳綠楊絲  
東風吹雨霽春霖一帶長江綠漲深料識山中花正發  
紅雲點染翠微岑

神川泛舟同岐山外川仁里詩竹神水江村諸子  
賦分韻得人字

水樹煙開夕照新扁舟載酒斫紅鱗紵衣清曠鷗衣白  
一幅江山畫裏人

五嶽樓同三田村黃雲

傑閣峻嶒倚碧穹振衣浩嘯坐天風睢陽獨作江淮障  
神禹長傳疏鑿功前句謂前田公後句相傳繼體天皇  
治水石像在足羽山歲時祭之  
一水潺湲流舍下五山空翠落杯中地雄形勝動高興  
况與故人談笑同

送畑仙齡畫史還東京

詩酒清游半載程又提筆硯向京城宣和文物方全盛  
五嶽觀中揚姓名



落日登高望帝畿故人襍被倦游歸情知望嶽動高興  
潑墨淋漓風雨飛

和歌浦

海天片席帶潮還紀淡峯巒縹緲間不老橋頭斜日敞  
觀音閣俯郭公山

次韻寄筏井東園在粟津

與君同是里爲鄰客舍相逢意倍親那谷寺邊秋色好  
滿山紅葉待吟人

冬晴出遊

朔雲無力放新晴風戰黃蘆古岸濱收拾風光能幾許

蹉跎寒事獨遊人

寒風不見酒旗搖十里江南草木凋寂寂平蕪歸牧路  
夕陽作意上村橋

初夏集於高砂亭得敲津二字

以下係明治卅六年癸卯作

綠陰如水濕衡茅猶有殘花照半梢醉倚闌干山色澹  
隔江何處暮鐘敲

夕陽簾閣淨纖塵隔岸吳山積翠新煙水一篙風一面  
釣魚舟繫綠楊津

美人讀書圖

絕代佳人憶二喬蛾眉相見也魂銷一編韜略夜深讀



遮莫銅臺春寂寥

雲鬢詎向鏡奩梳  
慢臉嬌娥花不如  
懶學尋常閨秀美  
珠簾深處讀兵書

水檻遣懷

浮城城外釣漁磯  
當面青山翠溼衣  
帆趁暮潮天際返  
魚吹落絮浪頭飛  
恩牛怨李何時了  
覆雨翻雲與志違  
唯有水流心不競  
白鷗來往自忘機  
江流蕩蕩漲城隅  
舉目天涯風景殊  
唇齒輔車盟可固  
虎狼溪壑慾難圖  
千秋王氣銷沈盡  
四百山河形勢孤  
碧海掣鯨非我事  
祇應韜跡混樵蘇

眼看滄海水橫流  
時事關心不敢休  
蛇豕荐將遼海食  
英雄誰解北門憂  
十年失計仍爲客  
一代行藏獨倚樓  
老去心情增感激  
空搔白髮思悠悠

孤亭俯瞰大江東  
思入蒼茫感慨中  
蔽海艨艟民力盡  
聳雲第宅聖恩隆  
三州水旱雖銷禍  
六郡荒凶不救窮  
伏闕奏章猶未達  
幾時清議副宸衷

遙知仙仗九重來  
諮議堂開鷓鷯陪  
苟且一時真可笑  
糊塗大事不勝哀  
江湖漫詫功名會  
馬政誰堪幹略才  
回首中原長大息  
虞淵頽勢挽難迴

亭角覓詩得輕字



小樓深巷聽殘鶯日永新詩尙未成一笑掀簾倚亭角  
滿庭躑躅午風輕

湖海唸社卽題分韻得東鐘二字

以下係明治卅七年甲辰作

長空飛鳥望無窮隔水峯巒畫障中一片寒光照平楚  
夕陽猶在雁橋東

寒風獵獵水淙淙樓閣臨江影幾重撞破乾坤一白裏  
出山隱隱講時鐘

寄澤邊佶堂在清國漢口時明治卅七年二月紀  
元節征露宣戰之日

擬溯長江觀九州故人遙作武昌游漢旌詎使天驕拔

杞國空關我輩憂北望鼓聲震地西征貔虎氣吞牛  
知君一劍憑欄處極目蒼茫筆欲投  
游子天涯夢復驚朔邊驕虜乍縱橫膺懲有典正須法  
樽俎折衝何所成上國寧容食蛇豕滄溟直以斬蛟鯨  
脣齒輔車相依久努力善鄰安聖明

梅溪訪友圖

峯轉溪迴一路賒春山千樹發梅花幽人別有琴書約  
踏雪來尋處士家

樓閣參差樵徑分梅花如雪吐清芬故人家在白雲裏  
漠漠寒香漲夕曛



暗香疎影帶春煙夾路梅花粉態妍隔樹書聲微入聽  
吟驢爲駐碧溪前

春日樓望得屏山二字

雨後春流綠滿汀浮城寒食草青青乾坤浩蕩豁吟眺  
一幅江山開畫屏

一片蒲帆去復還高樓指點暮雲間幽人別有關心事  
目斷天邊長白山

送人從軍

長風截浪駕鯨鯢漠漠胡塵隔海昏馬革裹屍丈夫事  
掃清邊寇答君恩

西來鼙鼓震遼陽封豕長蛇恣陸梁壯士不驕號令肅  
千軍天弩夜收鎗

拍天春水舵樓高節鉞威風捲海濤一戰應須驅黠猾  
黑龍江上建旌旄

刀

三尺寒芒百鍊堅龍鳴虎吼欲騰天妖魔撒捩不敢近  
氣凜清風沙漠邊

寄懷岩田檢事正在和歌山

南紀風光天下聞山容水態共氤氳梅花細雨相思夢  
杳繞觀音寺畔雲



南國美人消息遲望君渺渺有餘思推誠斷獄無邪觸  
正是風霜獨立時  
別來夜夜夢魂飛廿載神交不敢違御史豸冠嚴在首  
風威霜質似君稀

三  
花後過神上得歸青二字

鳴鳩乳燕故飛飛節過清明景物非好趁薰風江上去  
青山影裏送春歸  
隔水峯巒敞翠屏迎人去過白鷗汀蹉跎春事過寒食  
花落烏啼芒麥青

西  
木出塞

朝出平壤營暮進鴨綠汜落日沒白山浮雲連遼海大  
漠兵氣纏北望轉逶迤咄彼羅刹王眈眈作虎視背盟  
破公義暴橫無底止竊據東亞洲貪婪若封豕遼陽又  
奉天剽掠戮無算我皇自神武赫赫總乾紀太歲在甲  
辰二月佳節始鳳詔宣膺懲不違公戰禮億萬惟一心  
敵愾齊蹶起赳赳此武夫忠烈爭效死雷霆走精銳天  
地忽震駭絕海斬長鯨裂山立海水已制海上權威武  
振千里尙有三邊賊猖獗勢倍蕤桓桓上將軍克復仗  
天啓西斷烏拉險北拔金角壘掃蕩策偉勳以茲報天  
子

自註浦鹽斯德一日金角港



西征紀事

口唱平和心是狠還遼遺恨十年長九重新下膺懲詔

薄海風雲氣激揚

奉讀宣戰詔勅

雄風乍捲子胥潮犀甲三千氣壓遼萬礮雷轟飛鐵艦

黑雲開處旭旗飄

旅順大捷

山飛海立礮聲頻大節堂堂罕等倫中佐一身都是膽

精忠義烈配軍神

廣瀨中佐

孤軍誤被海中鏖殺氣衝天風怒號二百健兒齊殉節

鴻毛一死泰山高

金洲丸沈沒

銜枚伏甲蟻飛艘萬馬無聲曉渡江吶喊一齊殲猾賊

望風羣醜倒戈降

五月一日渡鴨綠江

剪人如草慘無聲三面包圍斫七營屍滿溝阮血漂杵

神兵已略九連城

占領九連城

邊疆草木望風迎仁義王師號令新從此三軍如破竹

遼陽城是受降城

其二

果然大捷動三邊蔽海舳艫千里連極目遼東灣一角

旭旗高颺滿州天

第二軍遼東上陸

神軍二道出遼東沙際連營旭旆紅朔漠徑應收指掌

何人擒獲黑鳩公

五月五日占領鳳皇城

靖邊師豈在屠城擬斷天驕拔漢旌料識胡王應破膽



陸擒封豕海長鯨

腹背夾攻如括囊金湯不守走倉皇紫髯綠眼亞提督

可愧當年丁汝昌

亞曆提督逃竄

陷落連城士氣揚金州旅順扼喉吭不知在德不在險

天塹山河難可防

占領金州

後紀事十二絕

鐵網鹿柴仍地雷任他胡羯氣崔嵬神兵一鼓南關嶺

霹靂撼山山欲摧

南山大捷

超屍蹠血逼胡營豈止長平十萬阬日落南山礮聲罷

城頭高颺旭章旌

陷金州城

沙場百戰電霆揮斬將塞旗疾似飛十萬胡兵半盡殺

如斯大捷古來稀

得利寺大捷

王師連戰奏奇功百里邊屯破竹中助順可知天意在

遼陽無計援關東

收蓋平

大漠風雲指顧通黃沙百戰旭旗紅懸軍絕幕漢飛將

誓立山河帶礪功

黑木大將

摩天宿霧曉濛濛胡騎重來若疾風漢將大旗儼不動

排空一劍走西戎

摩天嶺逆襲

鐵嶺岫巖將蓋平神軍三道迫遼城勦除頑獷知非遠

仁義王師孰抗衡

三軍迫遼陽



十萬吳犀壓海洋幾回擣穴懾西羌自言勳業仗天祐

落落東鄉平八郎東鄉大將

上將握奇河鼓分馬頭叱咤捲風雲當年頗牧伴兒戲

絕域雄收不世勳奧大將

大樹將軍威望隆至尊推轂授元戎出師不翅清邊寇

整頓乾坤贊聖功大山元帥

連城大帥黑鳩公未見折衝千里功昨潰朔東今朔北

遼陽遂墮重圍中黑鳩將軍

極目蒼茫遼海灣樓船擣穴斗杓殷胡巢半破殘兵散

落日西風旅順關八月十一日黃海大捷

九月四日皇軍占領遼陽

草木皆兵虎嘯風三軍意氣捲遼東淬仁劓義神州劍

百萬胡兒一擊空

池上晚步得松字

翠煙浸水夕陽春愛此風光趁竹筇無限塵機隨處息

滿庭風露月當松

追悼沖禎介

逮繫邊疆恨可知苦辛報國志堪悲陰風慘雨豺狼窟

想見從容就死時

甲辰十一月念日神上秋山亭雅集席上分韻得



簾多二字

一笛斜陽閃酒帘  
雁聲搖落客愁兼  
無多風景還無賴  
隔水笙歌捲畫簾  
殘照西風拍岸波  
鬢絲倒影感恒河  
醒來莫語邦家事  
老去離憂一倍多

明治卅八年乙巳一月二日聞旅順口陷落記喜

九天闐闐曉曠曠  
萬國衣冠朝法宮  
歲在龍蛇頻戰伐  
春兼梅柳共昭融  
瀋陽烽燧未全熄  
渤海妖氛一掃空  
堪喜皇威振絕域  
三軍旗鼓滿遼東  
胡兵天塹力難支  
不敵堂堂神武師  
拔幟先登駭狐鼠

復隍壓死瘞熊羆  
水師營上受降處  
松樹山前宣誓時  
更有皇恩寬大詔  
鯨鯢免戮仗仁慈

甲春神上得聞字

梅花細雨日方曛  
好上江亭酒一醺  
鐵鎖不搖舟繫岸  
水禽聲在半空聞

奉天大捷歌奉賦  
大山大將兼呈大島九師團長  
瀋陽烽燧連壁壘  
戰鬥線亘一百里  
颯沓勢如風雨臻  
三軍突擊從此始  
礮煙慘澹晝晦濛  
興京撫順石火中  
剪虜如草草漲血尺  
腿寸臂飛滿空白日  
不動元戎轟虜兵  
獸遁窮追速清室  
宗社發祥地秋毫不犯軍令肅



八十萬衆雷霆驅一戰鏖殺廿萬胡偉功烜赫輝宇內  
如此大捷曠代無翻憶彼胡暴似虎幕府板蕩寇疆禦  
樽俎割讓樺太島隱忍卅年屈難抒又憶乙未征清年  
糾合列國威四邊口唱和平迫還土撤兵盟約付雲煙  
剽略滿州據遼左封豕長蛇欲食我膺懲大義天下宣  
出師要在斷後禍連戰連捷一年餘大連旅順歸版圖  
遼陽奉天已克復狼藉游魂半掃除長城以南胡塵滅  
天人之仇就天罰將軍橫槊氣如天去賦烏拉山上月

病中雜吟

余今茲四月初罹病至七月漸覺快理此間身外百

事隨聞偶吟

臥病空堂感鬢華夕陽飛絮入窗紗三春詩夢冷於水  
孤負吳山桃李花

幽居寂寂掩柴門藥杵聲中晨竟昏偶有故人來起我  
批風抹月與清言

老去春愁一倍加無多好景夕陽斜南窗閑把維摩讀  
楚楚蜉蝣戀晚花

才名廿載壓都門大雅扶持斯道尊一夜文星天上墮  
白雲何處可招魂

哭野口寧齋

平生友誼有餘師歷落鬚眉失所知升堂三號隔千里



天教孤負老頭皮

同上

昨哭寧齋今哭君愁雲慘日嘆離羣布衣憂國文章在

滿腹經綸策筆勳

哭山田愛川

海內交游老更親梅花細雨亦傷神竭來傳訃真疑夢

一月三回訣故人

哭久松猶堂

五月廿八日日本海大捷敵國波羅的艦隊殲滅

窮古之戰勝也

蔽海峨艦勢飛揚大舉來衝玄海洋何識皇師有神助

雷霆一擊殲西羌

波濤倒立水雷驅絕海艨艟齏粉無赫赫東鄉大提督

震天威武耀寰區

九月初二秋山亭席上次李雪岳韻

吳山帶雨夕陽收結伴適成詩酒游欲打紅鱗爲下酒  
扁舟一棹沈寥秋

次韻勝島仙坡

時日俄和成國論沸騰傳輦下騷亂之警

相逢對酒此心真班管題詩紅粉親寄謝風流劉禹錫  
竹枝一曲妙通神

百戰沙場絕代功折衝尊俎一朝空何緣回復邦家計  
億兆精誠未貫通

神陽館外夕陽邊有客閑游放酒船節過立秋天宇曠



賓鴻未度靜前川

十月七日古重陽邀飲王漆園李雪岳兩翁于秋

山亭偕岐山外川吳江神水藍田仁里天籟旭泉

金湯外山耕村江村希仙如癡詩竹賦得樓暉二

字

眼中李白與蘇歐文酒留連共勝游憑仗詞人賦黃菊

滿城風雨上江樓

如是勝游相值稀重陽風物特依依顧余病骨秋來健

放眼江山戀落暉

十月十二日秋山亭席上卽事次韻王漆園

滿江秋水浸長天雨後青山晚霽妍鐵鎖不搖舟繫岸  
何人呼渡立前川

次韻中林梧竹老人見贈詩

石鼓嶧山歸一空差訛字體嘆今風知君碑版搜羅遍

秦漢晉唐毫素中

乙巳晚秋次韻王漆園留別詩

驪歌一曲淚霑襟杳杳程途隔碧岑秋雁隨人勞遠夢  
江楓吹冷放愁霖采風應有轡軒錄撫劍何孤報國心  
到處天涯知己遍休言倦翮似歸禽

歸興江城入越吟貂裘此去客程深山遮驛路分秋色



雁度寥空留夕陰對酒休爲華髮嘆有詩偕抱白雲心  
重逢把臂應非遠芝海扁舟載月斟

上 明治卅九年丙午新年作次韻王漆園見寄詩却

贈

朔北洗兵天下春祗應作頌要詩人三軍振旅凱旋始  
百戰奏功恩賜新半壁寒梅光吉日上林瑞雪灑芳辰  
生逢昌代無餘事一盞屠蘇酒滿巡

五月十四日土居香國來訪次韻見贈詩

相逢一笑上江樓依舊青山映碧流世事年華俱鼎鼎  
落花飛絮雨悠悠南天空抑鵬搏志北闕休爲肉食謀

好是清明春盡候無多同調喜同游

松方海東樞府古稀壽詞

蹇蹇王臣憶匪躬會當金策紀元功資財軍國能兼智  
職繫安危始有終聖代鸞凰自巢閣歲寒松柏恰凌空  
遐齡七十猶康健帝眷殊深爵祿崇

次韻淺野松僊五十自述詩寄呈

家住青山白水鄉老松下有茯苓香百年纔半方知命  
休向秋風歎鬢霜

清福由來冠一鄉恭謙好客送迎忙高門世業彰家道  
積善餘慶樂未央



十月二日古中秋無月水明亭席上分韻同外川  
藍田金湯諸子賦

賞酒還爲卜夜游滿天風雨古中秋一年明月今孤負  
桂樹晝欄空自愁

綠酒紅燈照碧潭愁雲愁雨過更三今宵不獨數無月  
又少詩壇陸劍南

秋晴欄興同諸子賦得來字

浮城城下小亭臺隔岸峯巒墮酒杯一片斜陽照平楚  
雁聲搖落度江來

海道汽車中看富士山

千里江山鐵輅通函關載夢過龍嵒雲中忽現芙蓉頂  
特立巍然鎮海東

寄題鶴山結巢

鶴山山上古祠頭仙鶴抱雛松樹稠正值王師懲索虜  
天將祥瑞壯千秋

五嶽樓寄懷阪本太守

北海高風耳久聞一尊何日細論文催人世事匆匆去  
孤負樓頭五嶽雲

寄題茗澗

溪流瀾瀾響于琴小閣重簾塵不侵纔信宣城詩句好



居然山水有清音  
恠崑奇石古祠湄  
靄靄青林午景移  
如此谿山何所似  
米南宮畫柳州詩

北窗寄島田神水題其墨竹  
十年研鍊有餘師  
寫竹畫蘭還賦詩  
同社才英原不乏  
風流妙墨似君誰

處士風流與俗殊  
日描墨竹供清娛  
琅玕也帶皇英淚  
寫出瀟湘寒碧圖

蕭蕭寒色壁間低  
上逼蘇黃下仲圭  
最是賞心幽絕處  
露梢風葉月清凄

大正十四年三月一日印刷  
大正十四年三月五日發行

編輯兼發行者 內山松世

富山縣婦負郡百塚村

印 者 野田文之助

東京市神田區今川小路  
二丁目十七番地



終

